

禹  
貢  
鄭  
注  
釋

禹貢鄭注釋序

嘉慶壬戌夏五月自都中歸阮撫軍以書來招之往浙  
詢以古三江之說時撫軍撰浙江考宗班固地理志而  
以鄭康成之說爲非循曰鄭氏未嘗非也鄭氏三江之  
注合於班氏今人所輯之鄭注取自初學記者非鄭注  
也因詳爲言之撫軍以爲然蓋近之學者不求其端不  
訊其末惟鄭之欲聞乃鄭氏之書見存者不耐討索而  
散而求之殘缺廢棄之餘於是不辨其是非眞僞務以  
一句之獲一字之掇爲工及其以贗爲眞又不復考其  
矛盾齟齬之故甚而拘守僞文轉強眞文以謬與之合

削足以適履鍛頭以便冠而鄭氏之本義汨沒於尊鄭  
之人使鄭氏受不白之枉伊誰之咎耶班氏地理志叙  
云采獲舊聞考迹詩書推表山川以綴禹貢周官春秋  
下及戰國秦漢焉蓋其所采博所擇精漢世地理之書  
莫此爲善故鄭氏注經一本於是或明標所自或陰用  
其說間有不合者亦必別據地說等書明言其所以易  
之義注雖殘缺尙可考而知也是冬十月從浙歸來寒  
臆無事與子弟門人論說及之以嘉定王光祿陽湖孫  
觀察所集之本爲質考而核之編次成卷專明班氏鄭  
氏之學於班曰志於鄭曰注而以水經禹貢山水地澤

所在一篇條列而辨之於末其餘枝葉繁多今無取焉  
十二月臘日江都焦循叙於半九書塾之因柳閣

禹貢鄭注釋卷上

江都焦循學

禹敷土隨山刊木奠高山大川

**注**必隨州中之山而登之除木爲道以望觀所當治

者則規其形而度其功焉

正義○凡見尙書正義者單稱正義

循按王本孫本又引周禮大司馬疏今考大司馬疏云禹貢云敷土敷布也布治九州之水土是敷土之事也此賈疏敷土二字引禹貢其敷布也云云則賈氏自言以釋鄭氏周禮注禹治水敷土之文非鄭氏尙書注也二本並誤

冀州既載

**田**載之言事事謂作徒役也

正義○公羊莊公十年傳疏

禹知所

當治水又知用徒之數則書於策以告帝徵役而治

之

正義

兩河間曰冀州

史記集解○公羊莊公十年傳疏

不書其界者

時帝都之使若廣大然

公羊莊公十年傳疏

循按經典釋文云載如字載載於書也馬同鄭韋

昭云載事也馬同者同於孔也鄭與韋昭同以載

訓事鄭下當連名傳寫失耳

壺口治梁及岐

**禹**河東郡北屈

禹貢壺口山在東南

左馮翊夏陽故

少梁秦惠文王十一年更名禹貢梁山在西北龍門

山在北

右扶風美陽

禹貢岐山在西北中水鄉周太

王所邑

**注**地理志壺口山在河東北屈縣之東南梁山在左

馮翊夏陽岐山在右扶風美陽西北

史記集解○岐山句又見詩周

南召南譜正義多西北二字

於此言治梁及岐者蓋治水從下起

以襄水害易也

正義

循按大雅緜正義引鄭書傳注云岐山在梁山西

南此明標書傳注則伏生尙書大傳之注也王本

誤爲書注史記索隱所載與集解同蓋後人誤以

集解寫入索隱也

又按志凡明標禹貢卽當時立學官之今文尙書也曰古文以別於今文也鄭氏明標地理志而復申言之以爲治水自下起以襄水害易蓋以經屬冀州而扶風馮翊則在雍州恐後人疑惑別起異端故疏說其義而梁岐爲雍州之山可決矣呂氏春秋古樂篇云禹立勤勞天下日夜不懈通大川決壅塞鑿龍門降通涿水以導河高誘注云決壅塞故鑿龍門也降大也涿流也愛類篇云昔上古龍門未開呂梁未發河出孟門大溢逆流無有邱



陵沃衍平原高阜盡皆滅之名曰鴻水注云昔龍門呂梁未通河水稽積其深乃出於孟門山之上大溢逆流無有涯畔也淮南修務訓亦言禹鑿龍門闢伊闕哀帝時賈讓上治河策申言之云昔大禹治水山陵當路者毀之故鑿龍門闢伊闕析底柱破碣石墮斷天地之性鑿之云者卽治之謂也禹貢言山水獨此稱治非鑿而通之曷以云此周髀算經商高對周公言積矩之法謂禹之治天下者此數之所生趙爽注云禹治鴻水決流江河望山川之形定高下之勢除滔天之災釋昏墊之厄

使東注於海而無浸逆乃句股之所由生也惟禹明於數理以知地勢故導水必先以導山自岍而岐而荆山以逾於河復連壺口雷首太岳底柱析城王屋太行恒山至碣石入海山脉自西而東而北必導水行於山外非由龍門不可是地既隘水不暢流遂橫入冀都此橫流逆行懷山襄陵所由來也高誘注淮南云龍門本有水門禹闢而大之故言鑿舍此而河不能以入海故鑿之龍門鑿而水南下冀都之鴻水乃平志言龍門與梁山同在水南則鑿龍門卽治梁山也水經河水南過河東

北屈縣西注云北屈縣故城西十里有風山西四  
十里河南孟門山與龍門山相對大禹疏通謂之  
孟門卽龍門之上口也實爲河之巨阨兼孟門津  
之名矣此石經始禹鑿其中水流交衝迄於下口  
又南出龍門口注云大禹導河積石疎決梁山謂  
斯處也卽經所謂龍門矣魏土地記曰梁山北有  
龍門山大禹所鑿通孟津河口廣八十步巖際鐫  
迹遺功尙存依此禹於夏陽鑿龍門於北屈鑿孟  
門鑿孟門卽治壺口也壺口梁山旣治而河水南  
下矣河無定者也積石至龍門阻而橫流一旦鑿

而通之既出龍門非南溢必且四潰乃治岐使渭  
水挾關中諸水之力從西來逼之東行於太華雷  
首之間故治壺口不治梁水仍擁積而不行治梁  
而不治岐水之南決無由趨而東也壺口梁岐之  
治三者間不容髮故曰壺口治梁及岐禹之用渭  
猶今之用淮也河水湍急非有他水持之未可言  
治治梁及岐卽所以平冀州之水又何疑於雍州  
之山哉

既修太原至于岳陽

**志**

太原郡

秦置在晉陽屬并州

河東郡

霍太山在

東冀州山

**注**岳陽縣太岳之南於地理志太原今以爲郡名太

岳在河東故縣彘東名霍太山

詩唐風譜正義○  
周禮職方氏疏

循按志不言禹貢言冀州山謂職方冀州其山鎮  
曰霍山也鄭氏注職方云霍山在彘亦本志也彘  
縣順帝改爲永安縣故曰故縣

又按胡朏明謂華陰之太華山鄠縣之灋水上雒  
之熊耳蒲反之雷首彘縣之霍太山長子之濁漳  
水屯畱之絳水壑王之太行山華容西陵編縣之  
雲夢澤鉅野之大野澤鄴縣之故大河博縣之岱

山蓋縣之沂水萊蕪之淄水毗陵之北江水充縣之澧水河關西南羌中之積石山及河水刪丹之弱水直路之沮水卞縣之泗水成平之徒駭東光之胡蘇鬲縣之鬲津皆禹貢之山水而獨不繫之禹貢義例參差貽惑後人臚明此說非也班氏於鬲津引平當言於弱水引桑欽言可知其凡稱禹貢稱古文者皆信而可徵其不可遽定者則闕之上雒熊耳蒙上禹貢雒水言絳水於信都入海稱禹貢絳水互見者也霍山漳水雲夢大野沂水留水北江水泗水皆主職方言之而禹貢則從其略

岱華大行河水之類則又不必言者也其澧沮泗漳等水或以當時所行或以舊聞所未有班志志漢一代之郡縣禹貢原不必盡載以此爲貽惑後人班氏不受也東至于澧志引禹貢本作醴鄭氏訓以地名非水名也亦以規之不啻以牛矢而當狐父之戈也

又按班志自言考迹詩書綴禹貢周官春秋今考志言禹貢外舉職方最多乃揚州之五湖荊州之湛豫州之波滢青州之望諸兗州之廬冀州之楊紆皆不詳以疑之當闕也幽州之豎無閭冀州之

潞青州之沂兗州之岱豫州之滎幽兗之河沈亦  
不詳則不必詳者也於三江則分指南江北江中  
江於江漢則指沮水尤爲精密蓋宜詳則詳之可  
略則略之也鄭氏注職方讀波爲播以卽滎播之  
播差引春秋傳除道梁差之差而疑其宜在荊州  
青州之望諸以爲明都在睢陽廬維讀作雷雍嘔  
夷疑卽平舒之邠夷蓋經生說經可用六書假借  
諧聲以通其說班氏著史必依文考信故班氏有  
不詳而鄭氏詳之也若夫漳水班言在沾鄭言在  
長子一以清漳言一以濁漳言異而同也時水班



言在博昌鄭言出般陽于欽齊乘言時水之原南  
近淄水北至般陽新城縣東南又北至博興南博  
興卽漢博昌縣地般陽路卽漢般陽縣地新城在  
北八十里然則時水所經實兼般陽博昌亦異而  
同者也惟嘔夷鄭言邴夷班言洩維水鄭言卽濰  
班言是維爲大異乃鄭第擬度之詞班采舊聞必  
有所受說文洩水卽嘔夷水并州川也濰徐州濱  
夏書曰濰淄其道與班志同鄭注職方不及注禹  
貢之精而賈疏尤爲疏略附論於此

覃懷底績至于衡漳

志河內郡懷 上黨郡沾 大黿谷清漳水所出東北

至色成入大河過郡五行千六百八十里冀州川長

子 鹿谷山濁漳水所出東至鄴入清漳

注懷縣屬河內史記集解衡漳者漳水流地理志云漳

水上黨沾縣大黿谷東北至安平阜城入河詩邯鄲

義○周禮職方疏行千六百八十里周禮職方疏

循按職方疏引云覃懷縣名屬河內乃河內有懷

無覃懷史記集解所引是也職方疏蓋統而撮之

故自太原以下冒之曰地理志詩正義有地理志

云四字是也

又按鄭注引地理志往往舉東漢郡邑之名以易之此古人引書之法取當時之名明志之地卽今之某地也王本謂鄭所引地理志非班志乃伏无忌黃景所作非也班志信都國有昌成侯國應劭注云信都國安帝改曰安平後漢郡國志冀州安平國阜城故昌城班志邑城蓋昌城之譌

厥土惟白壤厥賦惟上上錯

**注**

此州入穀不貢

正義

賦之差一井上上出九夫稅

正義

禮記王制疏

上中出八夫稅上下出七夫稅中上出六夫

稅中中出五夫稅中下出四夫稅下上出三夫稅下

中出二夫稅

王制疏

下下出一夫稅

正義疏

○通率九州

一井稅五夫

正義

厥田惟中中

**注**田著高下之等者當爲水害避也地當陰陽之中

能吐生萬物者曰土據人功作力競得而田之則爲

之田

正義

恒衛旣從大陸旣作

**志**常山郡上曲陽

恒山北谷在西北有祠并州山禹

貢恒水所出東入滹

靈壽

禹貢衛水出東北東入虜

池 鉅鹿郡鉅鹿

禹貢大陸在北

**注**地理志恒水出恒山衛水出靈壽大陸澤在鉅鹿

史記  
集解

大陸地者爾雅釋地八藪晉有大陸

周禮大  
司徒疏

循按治河之法備於冀州河出龍門得渭力挾之而東恐其溢也修太原以通汾水而持之既至孟津將欲載之高地則用伊雒諸水挾之而北恐其溢也通沁水以持之覃懷底績沁水通也沁持於河內洛逼於河南而河乃北就衡漳矣蓋河不可以土治而利以水治渭之勢向東者也河因之而東洛之勢向東北者也河因之而東北漳之勢向北者也河因之而北伊助洛北行故關伊闕以通

之恒衛助漳北行故通恒衛以從之水之合也既  
多則醞之爲漯匯之爲大陸播之爲九河皆在北  
行之後禹之治水用諸水之力以相推挽此中消  
息微矣

### 鳥夷皮服

**注**鳥夷東北之民賦食鳥獸者

史記集解

循按正義引作東方之民搏食鳥獸者也顏師古  
云搏食鳥獸食其肉而衣其皮亦作搏食

夾右碣石入于河

**志**

右北平郡驪成

大碣石山在縣西南

遼西郡案

下

官水南入海又有揭石水南入官

**注**戰國策碣石在九門縣今屬常山郡蓋別有碣石  
與此名同今驗九門無此山也禹由碣石山西北行  
盡冀州之境還從山東南行入河治水既畢更復行  
之觀地肥瘠定貢賦上下

正義

循按鄭注辨此碣石非戰國策之碣石必先引地  
理志右北平之文而後辨之也凡正義引鄭注大  
率以與孔傳異者既以傳海畔山卽北平驪成縣  
之碣石是與鄭合故不復舉鄭之引地理志而第  
舉其辨國策也此注殘闕可取班志補之

又按班志一言大碣石山一言碣石水水蓋以山得名武帝紀元封元年東巡海上至碣石文穎曰在遼西綦縣綦縣今罷屬臨渝此石著海旁驪成與綦雖分隸北平遼西而實爲接壤後漢皆並入臨渝魏書地形志平州遼西郡肥如有碣石隋書地理志北平郡盧龍開皇六年省肥如入新昌十八年改名盧龍有臨渝宮有碣石唐書平州石城本臨渝有碣石山蓋西漢縣多則分爲驪成臨渝綦三縣後漢併爲臨渝魏併爲肥如隋唐併爲盧龍石城盧龍石城皆臨渝地通典繫碣石於盧龍



唐志繫於石城其義一也史籍相承皆明注碣石  
正當緣碣石所在而定漢之驪成絜縣所在也導  
山叙山脉由大行恒山至碣石入海山脉至此入  
於海中山必瀕海文穎言海旁是也水經言在水  
中已與文穎海旁之說異酈道元乃言海水西浸  
而包其山又引張君言碣石在海中而證之以營  
州城垂淪者半又引韋昭以天橋柱爲碣石蓋皆  
擬度之詞胡朏明信之臆定驪成之所在而決碣  
石之沒於海中夫驪成果可憑空定其所在乎碣  
石本是山名夾右亦非泛海固不必求之水中矣

閻百詩古文尙書疏證云酈道元家酈亭今之涿州也距碣石六百餘里三言碣石淪於海無論今撫寧縣西有碣石山去海尙三十里卽其本朝文成帝太安四年戊戌登碣石山觀滄海改山名樂遊此豈包淪洪波者耶程大昌生南宋益附會以碣石在海中去岸五百餘里真妄談百詩與拙明同時相友善己不曲附其說如此

濟河惟沈州

**注**

言沈州之界在此兩水之間

史記集解

循按公羊莊公十年傳疏引此注作兩河間

九河既道

**注**河間國弓高

虜池別河首受虜池河東至平舒入

海樂成

虜池別水首受虜池河東至東光入虜池河

渤海郡東光

有胡蘇亭

成平

虜池河民曰徒駭河

平

原郡鬲

平當以爲鬲津

**注**河水自上至此流盛而地平無岸故能分爲九以

衰其勢壅塞故通利之也九河之名徒駭太史馬頰

覆釜胡蘇簡絮鉤盤鬲津

詩周頌般正義

周時齊桓公塞之

同爲一河今河間弓高以東至平原鬲津往往有其

遺處焉

正義○詩周頌般正義

循按弓高庫池所經鄭舉此正以庫池爲徒駭耳  
溝洫志云許商以爲古說九河之名有徒駭胡蘇  
鬲津今見在成平東光鬲界中自鬲以北至徒駭  
相間去二百餘里西漢時相傳如此

雷夏既澤灘沮會同

**志**濟陰郡成陽

禹貢雷澤在西北

**注**雍水沮水相觸而合入此澤中地理志曰雷澤在

濟陰成陽

史記  
集解

循按元和郡縣志云河南道濮州雷澤縣本漢鄆  
陽縣屬濟陰郡隋開皇六年於此置雷澤縣因縣

北雷夏澤爲名也澠水沮水二源俱出縣西北平地去縣十四里雷夏澤在縣北郭外澠沮二水會同此澤然則二水唐時尙存鄭生山左宜目見之桑土旣蠶

**注**其地尤宜蠶桑因以名之今濮水之上地有桑間

者

詩邶鄘衛  
譜正義

是降邱宅土

**注**此州寡於山而夾川兩大流之間遭洪水其民尤困水害旣除於是下邱居土以其免於厄尤喜故記

之

正義

厥土黑墳厥草惟繇厥木惟條厥田惟中下厥賦貞作  
十有三載乃同

**注**貞正也治此州正作不休十三年乃有賦與八州

同言功難也其賦下下

史記  
集解

厥貢漆絲厥篚織文

**注**貢者百功之府受而藏之其實於篚者入於女功

故以貢篚別之

正義

允征曰篚厥元黃紹我周王

堯典  
正義

○毛詩鹿  
鳴正義

浮于濟漯達于河

**志**東郡東武陽

禹治漯水東北至千乘入海過郡三

行千二十里

平原郡高唐

桑欽言瀑水所出

**注**地理志云瀑水出東郡東武陽

史記正義

循按志於平原高唐之瀑稱桑欽言於東武陽明其爲禹治瀑水是不以高唐之瀑爲禹治第存桑欽之異說耳

海岱惟青州

**志**泰山郡博

岱山在西北求山上

**注**今青州界東自海西至岱東巒曰岱山

公羊莊公十年傳疏

○詩齊風正義  
○史記集解

嶠夷旣略濰淄其道

**志**琅邪郡箕

禹貢維水北至昌都入海過郡三行五

百二十里兗州寢也

泰山郡萊蕪

原山淄水所出東

至博昌入沛幽州寢

**注**濰淄兩水名

詩齊風譜正義

地理志云濰水出今琅邪箕

屋山淄水出泰山萊蕪縣源山

詩齊風譜正義  
○史記集解

循按正義引地理志濰水出琅邪箕屋山北至都

昌縣入海然則班志原有屋山二字都昌又譌爲

昌都也北海郡有都昌無昌都水經濰水又東北

過都昌縣東又東北入于海

厥土白墳海濱廣斥



**注**斥謂地鹹鹵

史記集解

厥田惟上下厥賦中上厥貢鹽絺海物惟錯

**注**海物海魚也魚種類尤雜

史記集解

岱畎絲枲鉛松怪石萊夷作牧

**志**東萊郡黃

有萊山松林萊君祠

厥篚檿絲浮于汶達于濟

**志**泰山郡萊蕪

原山又禹貢汶水出西南入泲汶水

桑欽所言

琅邪郡朱虛

泰山汶水所出東至安邱入

維有三山五帝祠

**注**地理志汶水出泰山萊蕪縣原山西南入泲

史記集解

循按班志兩汶水而於萊蕪標禹貢蓋浮汶達沛  
則入沛之汶是也

海岱及淮惟徐州

**注**徐州界又南至淮水

公羊莊公  
十年傳疏

淮沂其乂

**志**泰山郡蓋

臨樂子山洙水所出西北至蓋入池水  
又沂水南至下邳入泗過郡五行六百里青州濱

**注**淮沂二水名地理志沂水出今太山蓋縣

周禮職  
方氏疏

循按職方氏青州其山鎮曰沂山其浸沂沫鄭彼  
注云沂山沂水所出也在蓋是沂水自出沂山不

出臨樂子山也志明言臨樂子山洙水所出西北至蓋則臨樂子山不在蓋矣與萊蕪原山岱汶同出之文有異水經洙水出臨樂山沂水出艾山亦是二山正義引地理志云沂水出泰山蓋縣臨樂子山南至下邳入泗是冠臨樂子山於洙沂二水非志義

### 蒙羽其藝

**蒙**泰山郡蒙陰

禹貢蒙山在西南有洞巖史國在蒙

山下

東海郡祝其

禹貢羽山在南鯀所殛

**出**蒙羽二山名

史記集解

大野既豬

**志**山陽郡鉅陜

大陜澤在北兗州藪

**注**大野在山陽鉅野北名鉅野澤

史記集解

東原底平

**志**東平國

屬兗州

**注**東原地名今東平郡卽東原

史記集解

循按史記索隱引博物志云沈州東平郡卽尙書

東原正義亦云東原卽今之東平郡

厥土赤埴墳

**注**埴黏土者也

考工記疏

循按釋文埴市力反鄭作戠徐鄭王皆讀曰熾韋  
昭音試文選蜀都賦丹沙施熾劉淵林注尙書禹  
貢曰厥土赤埴墳注引鄭元尙書注曰熾赤也  
考工記搏埴之工二注云埴黏土也疏云尙書禹  
貢曰厥土赤埴墳注亦云埴黏土者也注亦云者  
明其與考工注同也禹貢正義云戠埴音義同考  
工記用土爲瓦謂之搏埴之工是埴爲黏土故工  
黏曰埴然則鄭氏禹貢埴雖作戠而訓爲黏土同  
於孔傳故正義但明戠埴之義同不復舉鄭注假  
令鄭別有熾赤之異正義必明之矣鄭王讀若熾

者明其讀如此非卽訓埴爲赤旣訓埴爲黏土不當又訓作赤文選李注所引未可據信孫本兩列之王本不用考工記疏所引而竟以戠讀曰熾爲鄭注本文尤失之矣

草木漸包厥田惟上中厥賦中中厥貢惟土五色

**田**

土五色者所以爲大社之封

史記集解

羽畎夏翟

**田**

羽山之谷

詩節南山正義

循按周禮掌次疏云案尚書禹貢羽畎夏翟謂羽山之谷貢夏翟之羽此賈氏疏文孫本王本皆以

爲鄭注

嶧陽孤桐

**志**

東海郡下邳

葛嶧山在西古文以爲嶧陽

魯國驪

故邾國嶧山在北

**注**

地理志嶧山在下邳

史記集解

循按班志兩嶧山於下邳繫以古文鄭注本之或以鄒縣之嶧山當下邳之葛嶧山非也

泗濱浮磬

**志**

濟陰郡乘氏

泗水東南至睢陵入淮過郡六行千

一百一十里

魯國卞

泗水西南至方輿入沛過郡三

行五百里青州川

禹貢集注卷上

六

**注**泗水出沛陰乘氏

史記集解

循按班氏志地理其指精妙求之乃見卞之泗卽乘氏之泗也自卞至方與行魯國山陽兩郡耳何言三郡蓋入沛雖在方與而入沛之處實在乘氏乘氏屬沛陰郡合之恰得三郡又於乘氏叙泗水至睢陵入淮過郡六水經以爲沛之別流兩泗水本屬一水因至方與有入沛之曲折故兩叙之方與無沛乘氏始有沛一言至方與入沛一自乘氏叙其至睢陵入淮則入沛於乘氏可知然則何不



直言至乘氏入沛蓋泗水自卞至方與一自方與至乘氏入沛一自方與至睢陵入淮方與至乘氏本是駢枝故爲此互文其指自了耳夫方與至乘氏之水沛水也何不於卞叙泗水入淮而於乘氏叙沛水至方與入泗蓋泗水自卞來經魯縣及山陽之瑕邱平陽彙縣方與合沛水西至乘氏入沛此自乘氏東至方與者固沛水也乃自方與至湖陵仍名沛水自湖陵下至睢陽始專名泗水若直從卞叙至睢陵入淮則中間方與至湖陵實爲沛水故必兩叙泗水而於湖陵引禹貢淮泗達沛則

乘氏至湖陵爲菏水其名故不沒也禹貢於兗州  
言浮沛漯達于河於青州則止言達沛於揚州言  
達淮泗於徐州言浮淮泗達於菏互文以見之也  
菏之達沛則互見於導沛言沛東至於菏此菏不  
言澤則統陶邱乘氏至湖陵言之矣班氏以菏水  
歸於泗水而明之於湖陵水道瞭然經義亦瞭然  
班氏其善學禹貢者哉

淮夷蠙珠暨魚

**注**淮夷淮水之上民也

史記集解

淮水之上夷民獻此珠

與魚也

正義

循按周禮川師疏引注云蠙珠珠名淮夷二水出  
蠙珠與美魚此上又引云泗水淮水中見石可以  
爲磬此正引孔傳今孔傳文與此無一字異孫本  
直以爲鄭注王本云川師疏引鄭注亦云二水非  
也川師疏但標注云不標鄭氏何從而知爲鄭注  
乎釋文引馬氏以淮夷爲二水名與孔傳同史記  
集解孔鄭並引索隱云按尙書云徂茲淮夷徐戎  
並興今徐州言淮夷則鄭解爲得鄭固絕無以淮  
夷爲二水之說川師疏亦不誤也林之奇尙書全  
解云漢孔氏以淮夷二水名王肅亦同此說鄭氏

西漢書地理志卷上  
謂淮水之上夷民獻珠與魚當從鄭氏之說胡士  
行尚書詳解云淮夷孔云二水鄭云淮水夷民也  
宋時引鄭注者未有以二水之解屬之

厥篚元纁編

**纁** 纁細也祭服之材尚細

史記集解

浮于淮泗達于河

**湖** 山陽郡湖陵

禹貢浮于泗淮通于河水在南

循按鄭注殘闕說文作荷云荷澤水在山陽湖陵  
禹貢浮于淮泗達于荷从水苛聲水經亦作荷班  
志作河蓋省文

又按胡朏明謂地理志舉山水之名凡言禹貢者三十五如底道之養水非嶓冢之所導湖陵之荷水非東至之荷澤信都之絳水非北過之絳水安豐之大別非江漢之所會蜀郡之桓水非西傾之所因此蓋沿襲舊聞不可盡信養水絳水大別桓水各於條下辨之若禹貢言荷者三徐州達于河豫州荷澤導沆至于荷經於徐州之荷作河史記亦作河漢書仍之而於湖陵下引禹貢文則正恐誤河水爲大河之水非謂大河逕湖陵也志從省文說文用其本字荷之爲河蓋由來久矣豈僞孔

所改耶志於沛陰引禹貢荷澤荷澤在豫達于荷  
在徐本分爲二一爲澤一爲水固不同也惟達于  
荷之水卽由荷澤所分說文曰荷澤水明此水卽  
荷澤之水所分非謂荷澤卽在湖陵也班許或分  
或合各有精義未見其非拙明以爲不可信竊所  
未喻

淮海惟揚州

**注**揚州界自淮而南至海以東也

公羊莊公  
十年傳疏

彭蠡既豬

**志**豫章郡彭澤

禹貢彭蠡澤在西

**注**地理志彭蠡澤在豫章彭澤縣西史記集解南方謂都

爲豬

史記索隱

循按南方謂都爲豬檀弓注亦有此文

陽鳥攸居

**注**陽鳥謂鴻雁之屬隨陽氣南北

詩藹有苦葉正義

三江旣入震澤底定

**志**會稽郡吳

故國周太伯所邑具區澤在西揚州蘇

古文以爲震澤南江在南東入海揚州川

毗陵季札

所居北江在北東入海揚州川

丹陽郡石城

分江水

首受江東至餘姚入海過郡二行千二百里

蕪湖中

江出西南東至陽羨入海揚州川

蜀郡漁氏道

禹貢

嶠山在西徼外江水所出東南至江都入海過郡七

行二千六百六十里

臨淮郡海陵

有江海會祠

**注**

三江分于彭蠡爲三孔東入海

正義○唐邱光庭兼明書

循按鄭注殘闕其說三江必用班志言分於彭蠡者自彭蠡以下則爲三也石城蕪湖俱在彭蠡之下不曰分自石城而曰分於彭蠡者本經文言彭蠡既豬而解之也爲三孔則南江中江北江也九江孔殷孔以支派言此注孔字本之東入海卽班志所謂東入海明旣入爲入海也志云揚州川卽



用職方氏其川三江明以禹貢之三江卽職方之  
三江於漁氏道記江水所出至江都入海與記分  
江水受江於石城至餘姚入海之文同於毗陵又  
曰北江在北東入海於吳又云南江在南東入海  
其例一也岷江至江都勢趨東北而自江都入海  
則曲而東南故於毗陵明江之在北南江至餘姚  
入海勢趨東南而經震澤折而行禦兒由拳之間  
故於吳明江之在南惟其曲故廣陵曰曲江惟其  
折故錢唐曰折江中江至陽羨入海不復更言於  
他縣知中江不曲不折直從陽羨東趨於海也且

於吳曰南江在南則中江之不在南可知於毗陵  
曰北江在北則中江必在吳之北毗陵之南可知  
此言之可尋味而出者也文選江賦李善注引水  
經注云中江東南左會瀟湖瀟湖在今常州府西  
南三十五里半入宜興當太湖之北正漢時陽羨  
地會於瀟湖由瀟湖而東出今之吳松江口正中  
江入海之處但中江由陽羨歷昆山而至嘉定上  
海之間爲吳松口而南江則自貴池宣城廣德長  
興入太湖又自吳江出太湖折至嘉興石門錢唐  
餘姚入海爲錢唐江口自中江出瀟湖之口旣溼

南江逕禦兒之流亦塞而中江入海之委轉與南江出湖之條兩相接續于是曰松江曰婁江曰三江口支派紛緜莫可究問松江既冒中江之名婁江遂僭北江之號而澉浦入海之谷水且爲東江以充南江而庾氏三江之說起矣今吳松海口在嘉定縣東彼中江入漏湖者直趨此可也吳江所出之松江必北行乃達海口何入漏湖者旣南出吳江復北注耶今考而定之中江由宜興貫漏湖至嘉定入海南江由今吳江歷嘉興石門至餘姚入海松江中江也而崑山以南從吳江來者非中

江也谷水南江也而嘉興以東從海鹽澉浦入海者非南江也禹貢三江故迹不可考而知乎嘉定錢教授塘云仲初所云東江卽漢志之南江從吳縣南餘姚入海者也其云松江者卽漢志之中江從陽羨入海者也竊謂庾氏之東江與松江婁江並舉婁江今劉河昔亦通稱吳松江者與松江不遠其東江必不遠指餘姚至所云松江乃指松陵江東北至吳松口者與古中江不合夫入湖出湖其趨注之處必有形勢可指乃可決曰此中江也此南江也入漏湖者勢必出於太湖之北南江長

瀆自湖口入者必出於太湖之南酈道元叙東出之松江引吳記以說谷水固儼然以東出之江爲南江耳錢教授說南江最詳惟中江入海未能明析於此辨之

又按臨淮之海陵今泰州也已有江海會祠毗陵吳縣之東僅立一婁縣在今崑山縣地若今之通州太倉州松江府及常州之江陰靖江皆不設縣可知海濱之地至漢猶荒廢上溯虞夏之時則震澤以東江湖海混而爲一不更昭然乎旣導江之三孔東入海羣水以江爲歸江以海爲歸於是震

澤匯諸水而底定江一日未入澤一日未定也

又按徐堅初學記云案三江漢書地理志注岷江爲大江至九江爲中江至徐陵爲北江蓋一源而三目小字雙行云鄭元孔安國注云左合漢爲北江會彭蠡爲南江岷江居其中則爲中江故書稱東爲中江則岷江至彭蠡與南北合始得稱中也此所引地理志孔安國注今皆無是文惟鄭注殘闕無可考驗故後人轉舉而歸之程大昌禹貢山川圖云徐堅援鄭元書傳以證三江知一江爲三非出孔氏一家臆度近胡朏明遂深信爲鄭注因

取蘇軾東坡書傳之說以爲合於鄭而斥班氏爲  
誤王光祿後案云初學記引稱鄭元孔安國注殊  
不可解子據紹興四年東陽麻沙劉朝宗宅刻雖  
宋板下品究勝俗刻當無誤但徐堅不通經稱引  
舛錯不足怪而其爲此節之注則無可疑金殿撰  
禮箋云孔傳言自彭蠡江分爲三與鄭注不殊徐  
堅初學記併言鄭元孔安國注此謂南北中三江  
分於彭蠡以下鄭孔二注大意相同非具錄注文  
之舊蘇子瞻亦知三江之名不得移之彭蠡上顧  
以一江兼受南北中之名與初學記所述鄭孔之

說分爲三江入海者截然殊異或謂蘇說上與初  
學記合並以初學記兼載鄭孔二說爲鄭君注文  
者皆失考王氏金氏之識過於胡朏明遠矣乃王  
氏旣疑爲不可解而又以宋板爲無誤且強鄭氏  
眞注明著於正義者傳會於初學記所引之僞注  
則惑矣金氏明其非鄭君注文是矣乃正義所引  
眞鄭注明曰分於彭蠡爲三孔初學記所引則曰  
岷江至彭蠡與南北合合與分不可同年而語明  
矣史記正義引括地志其說如是是書魏王賓客  
所撰其譌謬牽傳益莫能免堅書或本之而誤與



胡朏明以鄭注三江一條足稱秘寶可謂不辨黑白者矣

篠簜既敷

**注**篠箭簜大竹也

晉戴凱之竹譜○儀禮大射儀疏

厥草惟夭厥木惟喬厥土惟塗泥厥田惟下下厥賦下上上錯厥貢惟金三品

**注**金三品者銅三色也

正義○詩泮水正義○周禮秋官職金疏○禮記禮器疏

○史記集解

瑤琨篠簜齒革羽毛惟木島夷卉服

**注**此州下濕故衣草服貢其服者以給天子之官

正義

厥篚織貝

**注**貝錦名詩云萋兮斐兮成是貝錦凡爲織者先染

其絲乃織之則文成矣

正義○史記集解

禮記曰士不衣織

正義

厥包橘柚錫貢

**注**有錫則貢之

正義

此州有錫而貢之或時無則不貢

錫所以柔金也

正義○史記集解

沿于江海達于淮泗

**注**均讀曰沿沿順水行也

史記集解

循按釋文云鄭本作松松當作沿馬本作均今史

記正作均集解引鄭云均讀曰沿是鄭本亦作均也鄭既讀均爲沿爲鄭學者因改爲沿遂又譌作松陸元朗依傳寫之本以爲鄭作松亦明其誤故辨曰松當爲沿也王本直以松讀曰沿爲鄭注大誤

荆及衡陽惟荆州

**志**長沙國湘南

禹貢衡山在東南荆州山

**注**荆州界自荆山南至衡山之南

公羊莊公十年傳疏

江漢朝宗于海

**注**江水漢水其流遒疾又合爲一其赴海也猶諸侯

之同心尊天子而朝事之荆楚之域國有道則後服  
國無道則先強故記其水之義以著人臣之禮

正義

九江孔殷

**廬江郡尋陽**

禹貢九江在南皆東合爲大江

豫章

郡鄱陽

鄱水西入湖漢

餘汗

餘水在北至鄡陽入湖

漢艾脩水東北至彭澤入湖漢行六百六十里

贛

章水出西南北入大江

南城

盱水西北至南昌入湖

漢建成

蜀水東至南昌入湖漢

宜春

南水東至新淦

入湖漢

雩都

湖漢水東至彭澤入江行九百八十里

南埜

彭水東入湖漢

長沙國安成

廬水東至廬陵入

湖漢

殷猶多也九江從山谿所出其孔衆多言治之難也地理志九江在今廬江尋陽縣南皆東合爲大江

正義

循按正義引鄭注地理志云云下云如鄭此意則上地理志正鄭氏所引也胡朏明言鄭不言處所是於正義且未細觀之乃用晁氏說以九江爲洞庭東陵爲巴陵何哉史記集解引鄭注地理志以下蓋史記作九江甚中鄭注不合故不取鄭氏孔殷之解孫本置地理志云云於殷猶多也之上非

是

又按禹貢言九江有四江漢朝宗于海九江孔殷一也九江納錫大龜二也岷山之陽至于衡山過九江至于敷淺原三也又東至于澧過九江至于東陵四也史記龜策傳神龜出于江水中廬江郡常歲時生龜長一尺二寸者二十枚輸太卜官九江之爲廬江郡廬江之納龜漢時猶然河渠書太史公自言登廬山觀禹疏九江淮南子稱禹鑿江而通九路漢書注引應劭曰江自廬江尋陽分爲九江與班志皆合鄭氏言山谿所出其孔衆多卽

本鑿江言之故曰治之難此在兩漢經史大儒所  
說皆九江在尋陽江之疏爲九皆禹迹故郭璞江  
賦云源二分於岷峽流九派於潯陽無異說也惟  
劉歆以爲湖漢水入彭蠡者見太康地記釋文引  
之湖漢卽貢水在彭蠡之南出今福建省班志詳  
記之乃志旣云湖漢水至彭澤入江于彭澤云禹  
貢彭澤在西于贛云豫章水出西南北入大江則  
諸水皆入贛水而贛水卽入彭蠡是彭蠡旣瀦卽  
豬湖漢諸水不可謂之江卽不可謂之九江故雖  
詳志九水而九江終屬之尋陽此班氏實深於經

而鄭氏亦無以易也釋文引尋陽地記云一曰烏  
白江二曰蚌江三曰烏江四曰嘉靡江五曰畎江  
六曰源江七曰廩江八曰提江九曰箇江又引張  
須元緣江圖云一曰三里江二曰五州江三曰嘉  
靡江四曰烏土江五曰白蚌江六曰白烏江七曰  
箇江八曰沙隄江九曰廩江參差隨水長短或百  
里或五十里始於鄂陵終於江口會於桑落洲二  
說名號小有殊異實與鄭注相成通典引作張須九江圖通  
典云同安郡舒州宿松漢皖縣地江水自鄂陵分  
爲九派會於此縣界州上三百餘里合流謂之九



江口東得武林洲卽桑落洲之水尾又云潯陽漢  
舊縣在江北今蘄春郡界此尤足證班志九江在  
潯陽南又云蘄州廣濟縣蔡山出大龜尙書曰九  
江納錫大龜卽此又云潯陽郡江州禹貢荆揚二  
州之境禹貢揚州曰彭蠡旣豬荊州曰九江孔殷  
今彭蠡湖在郡之東南五十二里九江在郡之西  
北唐人於九江一本漢志無有異端故蘇味道九  
江口詩云江路一悠哉滔滔九派來元稹詩云尊  
陽流水九條分皇甫冉詩云江至潯陽九派分葢  
雖有剽竅異說而千古相傳目之所遇皆從班不

從劉也宋人乃以洞庭爲九江殊非典要可不必辨

又按凡他水自源來附者謂之入經流逕過他水者謂之會自經流分出裹行者謂之迤自經流分之又合爲一謂之播謂之同惟此江緣水中磯石沙洲分爲九派而復合似九河之播而有不同河之播爲九則問別其道非一河也江之分爲九則穿達於磯洲之間實一江也故曰孔殷殷卽九之謂也爾雅釋詁孔間也江有所間而成九古人之文簡潔而形容如繪解爲甚中特虛詞耳或謂甚

中卽水由地中行之義水行地中江淮河漢皆然  
寧必九江乎

又按正義謂鄭意九江各自別源其源非大江也  
下流合於江耳程大昌爲鄭氏小九江圖云鄭氏  
不用一江分九之說自立一說曰九江者廬江尋  
陽山谿九小水入江者耳然鄭言山谿所出未嘗  
言九小水別源入江鄭氏明引班志東合大江之  
文則山谿所出正謂一江分九山脉盤結鑿而九  
之故曰山谿非別源也

沱潛旣道

**志**南郡枝江

故羅國江沱出西東入江華容夏水首

受江東入沔行五百里

**注**

水自江出爲沱漢爲潛

三國志吳主傳裴松之注

今南郡枝江

縣有沱水其尾入江耳首不于江出也華容有夏水

首出江尾入沔蓋此所謂沱也潛則未聞象類

正義

循按志於枝江記沱之名於華容記沱之實鄭取華容而辨枝江之非仍權諸班志也

雲夢土作义

**志**

南郡華容

雲夢澤在南荆州藪編有雲夢宮

江夏

郡西陵

有雲夢宮

循按鄭注殘缺周禮職方氏荊州其澤藪曰雲萑  
注云在華容禹貢注當亦然也爾雅楚有雲夢郭  
璞注云今南郡華容縣東南巴邱湖元和郡縣志  
云巴陵縣巴邱湖又名靑草湖在縣南七十九里  
周回二百六十里俗云古雲夢澤也因爲考之左  
傳宣公四年邾夫人棄子文于夢中杜預注云夢  
澤名江夏安陸縣城東南有雲夢城昭公三年鄭  
伯如楚王以田江南之夢注云楚之雲夢跨江南  
北定公四年吳入郢楚子涉睢濟江入于雲中注  
云入雲夢澤中所謂江南之夢正義引土地名云

南郡枝江縣西有雲夢城江夏安陸縣東南亦有  
雲夢城或曰南郡華容縣東南有巴邱湖江南之  
夢也邳與鄖字通邳夫人棄子文于夢中楚子旣  
奔雲中旋乃奔鄖奔隨則此雲中夢中必邳于邳  
矣邳在今安陸縣所謂枝江安陸有雲夢城者其  
澤之所在可迹而求之矣惟昭公三年以夢而繫  
諸江南故杜預謂跨江南北因傳文會而通之杜  
氏地理之學精核可知也郭氏注爾雅遂直以巴  
邱湖當楚之雲夢指其在華容之東南以本諸班  
志華容南之說則未明班氏之指也風俗通云今

漢有九州之藪揚州曰具區在吳縣之西荊州曰雲夢在華容縣南今有雲夢長掌之蓋漢時江北之雲夢已涸而江南之雲夢漸盛其定九州之藪直以在江南之巴邱湖爲雲夢澤班氏著本朝一代國史遵圖冊所載以澤在華容縣南所以尊國制也而復于西陵及編繫以雲夢宮地非雲夢宮何以名且又于志末述楚地云江陵故郢都西通巴巫東有雲夢之饒謂雲夢在江陵之東則不在華容之南矣後漢書法雄傳遷南郡太守郡濱滂江沔又有雲夢澤藪此正謂漢之雲夢在華容南

者與風俗通班志可互證矣

又按巴邱湖卽青草湖今在洞庭湖之南漢之雲夢在此楚之雲夢不專在此漢以此爲雲夢故洞庭之名不見于漢先是戰國時始侈言之嘗考其說莊子天運言洞庭之野中山經言洞庭之山未以水稱也海內西經云湘水出舜葬東南陬西環之入洞庭下湘水入洞庭之下明洞庭爲山而湘水逕其下是水仍名湘而洞庭自山無所爲湖也吳起說魏武侯曰三苗之居左有彭蠡之波右有洞庭之水此洞庭始以水稱乃史記吳起傳昔三



苗氏左洞庭右彭蠡既去水不言復易右爲左太  
史公固本諸國策而異文若此可疑者一也楚策  
蘇秦曰南有洞庭蒼梧此洞庭與黔中夏州一例  
不以水稱秦策張儀說秦王曰大破荆襲郢取洞  
庭五渚江南此文卽韓非子首篇初見秦張儀蓋  
韓非之譌而五都作五湖水經注云湘水沅水微  
水澧水同注洞庭北會大江名之五渚戰國策曰  
秦與荆戰大破之取洞庭五渚也湖水廣圓五百  
餘里日月若出沒于其中然則洞庭五渚卽洞庭  
湖矣乃云洞庭五渚江南似屬三地且燕策蘇代

云蜀地之甲輕舟浮于汶乘夏水下江五日而至  
郢都漢中之甲輕舟出于巴乘夏水下漢四日而  
至五渚史記蘇秦傳亦載此文索隱云五渚五處  
洲渚也劉氏以爲宛鄧之間臨漢水不得在洞庭  
吳師道亦云下漢而至五渚則五渚乃漢水下流  
洞庭在江之南非其地也此可疑者又一也楚詞  
九歌云駕飛龍兮北征遭吾道兮洞庭又云嫋嫋  
兮秋風洞庭波兮木葉下王逸章句云洞庭太湖  
也又云湘水波而樹葉落矣郭璞注中山經云今  
長沙巴陵縣西又有洞庭陂潛伏通江離騷云遭

吾道兮洞庭洞庭波兮木葉下皆謂此也注海內  
西經云洞庭地穴也在長沙巴陵今吳縣南太湖  
中有包山下有洞庭穴道潛行水底云無所不通  
號爲地脉推郭氏之指則洞庭者地穴之通名故  
包山有之巴陵亦有之鮑彪注戰國策引揚州記  
云太湖一名震澤一名洞庭水經注亦云湖中有  
君山編山君山有石穴潛通吳之包山郭景純所  
謂巴陵地道者也此可疑者又一也統而論之洞  
庭本地穴之名山以此得名湘水經其側因名洞  
庭之水水之所匯楚爲江南之夢漢爲雲夢澤晉

爲巴邱湖爲湘水所匯故王逸直以湘水解洞庭  
又以爲太湖明卽湘水卽湖也班志於武陵充縣  
言澧水東至下雋入沅於牂牁故且蘭言沅水東  
南至益陽入江於零陵郡言陽海山湘水所出北  
至鄴入江過郡二行二千五百三十里鄴與益陽  
下雋漢均屬長沙國鄴在今衡州府衡陽縣益陽  
在今長沙府寧鄉益陽之間下雋在今岳州府治  
以東班志詞簡每以互見非善讀者不能知旣曰  
澧水旣下雋入沅則沅固及於下雋者也乃云至  
益陽入江者其叙資水云都梁路山資水所出東

北至益陽入沅然則自益陽至下雋實資沅合流  
故叙資至益陽入沅叙沅至益陽入江復叙澧至  
下雋入沅互文之可識者也漢之湘南今之湘潭  
也漢之臨湘今之瀏陽也均在鄴縣之北而均以  
湘得名則湘水不止於鄴且鄴亦烏得有江而爲  
湘所入乎乃曰湘水北至鄴入江何也志於桂陽  
郡郴縣云耒山耒水所出西至湘南入湖又云耒  
陽春山春水所出北至鄴入湖此湖爲鄴湖劉昭  
注郡國志引荊州記云鄴有鄴湖周回三里取湖  
水爲酒酒極甘美水經叙春水北逕新寧縣東又

西北流注于湘水叙耒水北過鄆縣東北入于湘  
注云縣有鄆湖湖中有洲然則春耒二水與湘水  
合于鄆湖叙湘水至鄆又叙春耒二水之入湖明  
自鄆以北三水合入江也水經言澧水東至長沙  
下雋縣西南入于江沅水東至長沙下雋縣西北  
入于江資水東與沅水合于湖中北入于江湘水  
北至巴邱山入江又言江水東至長沙下雋縣北  
澧水沅水資水合東流注之湘水從南來注之此  
叙諸水極明似與班志異而實相表裏澧在沅北  
得從下雋西南入江沅在澧南得從下雋西北入

江何也水經固明言江在下雋之北沅澧資合而東注是知澧先合沅于東南而沅乃入江于西北叙言隱妙實與班同究而得之頤爲之解矣蓋沅水挾漸無酉辰序五水至益陽合資水而匯爲湖班氏以湖成于沅故于澧之入也仍子湖以沅之名澧入沅之地旣近沅入江之地謂之入沅可也謂之入江亦可也湘自鄱挾春耒之水直至巴邱山入江雖與沅澧合而自從東畔入江沅不得而統之志曰入江經曰南來注之其義一也不謂湘水沅水入湖者湖乃湘水沅水所會而成非本有

一湖而諸水注之故王逸方以湖爲湘班氏方以湖爲沅二水者非湖得而統之故不言入湖徑言入江非無湖也班志記雲夢澤于華容水經記資沅合于湖地之有湖可互見矣

又按吳入郢之役吳敗楚于雍澨五戰及郢楚子涉睢有鍼尹同舟王使燧象之事庚辰吳入郢楚子涉睢濟江入于雲中旣而奔郢兩言涉睢者蓋吳初及郢楚子涉睢西據睢漳尙與相抗吳旣入郢勢不可以相拒乃涉睢由睢達江由江至澤由澤至郢涉睢非過睢而西也濟江非渡江而南也



是時吳在郢不可以東轉由睢水南浮于江又北入于雲中藪澤之中水草叢雜故可匿耳不知涉睢濟江爲由睢達江而北遂謂雲中在江南矣左傳之叙事甚爲詳析兩言涉睢其事若繪若謂濟江而南則由雲至郢其必又濟江矣傳兩言涉睢不兩言濟江也吾于旣言涉睢又言涉睢濟江知其由睢達江而北也吾于入于雲中因而奔郢知雲在江北不在江南也

厥土惟塗泥厥田惟下中厥賦下下厥貢羽毛齒革惟金三品杕榦栝柏

**注** 檠榦栝柏四木名榦栝榦

周禮考工記疏○史記集解引四木名三字

柏葉松身曰栝

詩竹竿正義

礪砥砮丹

**注** 礪磨刀刃石也精者曰砥

正義

惟箇籥楛三邦底貢

**注** 箇籥籥聆風也

史記集解○考工記疏作箇竹聆風

楛木類周之始肅

慎氏貢楛矢石弩此州中生聆風與楛者衆多三國

致之

考工記疏

循按正義云鄭云箇籥籥風也竹有二名或大小

異也箇籥是兩種竹也肅慎氏貢楛矢知楛中矢

榦三物皆出雲夢之澤當時驗之猶然經言三邦  
底貢知近澤三國致此貢也是爲正義釋孔傳之  
文孔傳云籥箛美竹引鄭注聆風而申言其爲兩  
種傳云楛中矢榦三物皆出雲夢之澤近澤三國  
常致貢之正義依傳文解說其文明白易見孫本  
概以爲鄭注非也

厥名包匭菁茅

**注**匭猶纏結也菁茅茅有毛刺者給宗廟縮酒重之

故包裹又纏結也

史記  
集解

循按孔傳厥名屬上底貢句正義云鄭氏以厥名

下屬包匭菁茅史記漢書亦當下屬今上屬者裴駟顏師古爲之也

厥篚元纁璣組九江納錫大龜浮于江沱潛漢逾于洛至于南河

荆河惟豫州

**注** 豫州界自荆山而北至于河公羊莊公十年傳疏○詩王風譜正義

伊洛瀍澗旣入于河

**志** 宏農郡盧氏熊耳山在東伊水出東北入雒過郡

一行四百五十里上雒禹貢雒水出豕領山東北至

鞏入河過郡二行千七十里豫州川新安禹貢澗水

在東南入雒

河南郡穀城

禹貢灋水出替亭北東南

入雒

滎播旣豬

**滎**河東郡垣

禹貢王屋山在東北沈水所出東南至

武德入河溢出滎陽北地中又東至瓊槐入海過郡

九行千八百四十里

**滎**沈水溢出河爲澤今塞爲平地滎陽民猶謂其處

爲滎澤其在縣東春秋魯閔公二年衛侯及狄人戰

于滎澤此其地也

詩定之方  
中正義

循按檜風譜正義亦引此云沈水溢出所爲澤也

今塞爲平地滎陽民猶謂其處爲滎澤在汴縣東  
史記索隱亦引云今塞爲平地滎陽人猶謂其處  
爲滎播諸所引大致皆同惟其在縣東檜譜正義  
作在汴縣東漢志滎陽下有卞水別無汴縣此當  
有誤正義云鄭氏謂衛狄戰在此地知春秋云云  
亦鄭注也

導荷澤被孟豬

**陶**濟陰郡

故梁宣帝甘露三年更名定陶禹貢荷澤

在定陶東

梁國睢陽

故宋國微子所封禹貢盟諸澤

在東北

循按職方氏青州其澤藪曰望諸鄭注云望諸明  
都也在睢陽

厥土惟壤下土墳壚

循按陳祥道禮書云禹貢有墳壚孔安國鄭康成  
皆以壚爲疏蓋有傳然也

在三十  
四卷

史記集解引孔

曰壚疏也今正義本無之鄭注殘闕未知所本周  
禮草人埴壚用豕鄭注云埴壚黏疏者以黏訓埴  
以疏訓壚鄭以壚爲疏當有然者

厥田惟中上厥賦錯上中厥貢漆臬絺紵厥篚織纊錫  
貢磬錯浮于洛達于河

華陽黑水惟梁州

**注**梁州界自華山之南至于黑水也

公羊莊公十年疏

岷嶓既藝

**志**蜀郡漁氏道

禹貢嶓山在西徼外

隴西郡西

禹貢

嶓冢山

**注**地理志岷山在蜀郡漁氏道嶓冢山在漢陽西

史記

集解

循按後漢書郡國志漢陽郡西故屬隴西有嶓冢

山西漢水

沱潛既道



**志**蜀郡郫

禹貢江沱在西東入大江汶江江沱在西

南東入江

江原郫水首受江南至武陽入江漢中郡

安陽

鬻谷水出西南北入漢隴西郡西嶓冢山西漢

所出南入廣漢白水東南至江州入江過郡四行二

千七百六十里

**注**三水亦謂自江漢出者地理志在今蜀郡郫縣汶

江及漢中安陽皆有沱水潛水其尾入江漢耳首不

于此出江原有郫江首出江南至犍爲武陽又入江

豈沱之類與潛蓋漢西出嶓冢東南至巴郡江州入

江行二千七百六十里

正義漢別爲潛其穴本小水積

成澤流與漢合大禹自導漢疏通卽爲西漢水也故

書曰潛沱旣導

水經注

循按水經注潛水篇引鄭元曰云云不言禹貢注也其末云故書曰潛沱旣導似非書注矣或文有譌錯未可定依王本孫本錄以爲注而述所疑於此

蔡蒙旅平

**應**蜀郡青衣

禹貢蒙山谿大渡水東南至南安入濊

**注**

蔡蒙在漢嘉縣

史記集解

循按班志蜀郡青衣注引應劭云順帝更名漢嘉

和夷底績

**臨**蜀郡

禹貢桓水出蜀山西南行羗中入南海

**注**和夷上夷所居之地也和讀曰桓水出蜀郡蜀山

西南行羗中者也

水經注○釋文云鄭云和讀曰桓

循按鄭注引地理志又讀和爲桓然則班志禹貢桓水正指此和耳志又言禹貢西傾山在臨洮未嘗以桓水爲在西傾也胡肫明以班志不可信竊所未喻

厥土青黎厥田惟下上厥賦下中三錯

**注**三錯者此州之地有當出下之賦者少耳又有當

出下上中上者差復益少

正義

厥貢璆鐵銀鏤磬熊羆狐狸

**注**黃金之美者謂之鏤鏤剛鐵可以刻鏤也

史記集解

織皮西傾因桓是來

**志**隴西郡臨洮

禹貢西傾山在縣西南

**注**織皮謂西戎之國也西傾雍州之山也雍戎二野之間人有事於京師者道當由此道而來桓是隴阪名其道盤桓旋曲而上故名曰桓是今其下民謂是阪曲爲盤也

水經注

地理志西傾山在隴西臨洮

史記集解

浮于潛逾于沔入于涓亂于河

**注**

或謂漢爲沔

史記集解

循按傳同叔禹貢集解云浮潛以至漢上去沔爲近故舍舟陸行以入沔而沔之相通者有褒自褒逾斜北達渭言入不言達者以褒斜之間絕水百餘里上文旣言逾沔亦所以該下而省文也沔褒旣是水道言沔不言褒可也斜渭旣是水道言渭不言斜可也如必欲言沔渭之間有褒斜絕水不通則當曰逾于沔逾于渭古人之文豈如是之不簡直哉同叔名寅義烏人自言學者考經之詳當以余說爲當如右說不誣也胡朏明必謂褒斜二

水禹時可達而責班氏強爲附合之誤失之矣

又按余於同叔之解逾沔入渭而有悟於夾右碣石入于河此入于河猶言入于渭與導水言渭洛沛之入于河異義彼言水之入水此言人之入水水之入水則此水達于彼水自人言之則謂之達人之于水不言達而言入則非由水而水矣逾沔之後言入于渭自陸而水也夾右碣石入于河亦自陸而水也鄭言禹從碣石山西北行還從碣石山東南行入河亦謂夾山而行不言泛海注本明析自不明碣石入于海爲山脈入海又不明夾右

碣石入于河爲自陸入河遂以河之入海在碣石  
入于河爲泛海逆入于河因而爲島夷之貢道且  
謂碣石淪于海中矣若果由海入河則宜曰沿于  
海達于河揚州之文可例也

黑水西河爲雍州

**注**雍州界自黑水而東至西河也

詩韓奕正義○公羊莊公十年傳疏

弱水旣西

**注**衆水皆東此水獨西故記其西下也

正義

涇屬渭汭

**志**安定郡涇陽

開頭山在西禹貢涇水所出東南至

陽陵入渭過郡三行千六十里雍州川

**注**涇水渭水發源皆幾二千里然而涇小渭大屬于

渭而入于河地理志云涇水出今安定涇陽西開頭

山東南至京兆陵陽行千六百里入渭

詩谷風正義

汭之

言內也

正義

循按正義汭之言內也一句是鄭注下云蓋以人皆南而望水則北爲汭也且涇水南入渭而名曰渭汭知水北曰汭言治涇水使之入渭亦是從故道也此皆釋孔傳之文孫本誤以爲鄭注

漆沮既從



**志**右扶風漆

水在縣西

北地郡直路

沮水出東西入

洛

澧水攸同

**志**右扶風鄠

古國有扈谷亭扈夏啓所伐鄠水出東

南

荆岐旣旅

**志**左馮翊襄

禹貢北條荆山在南下有彊梁原洛水

東南入渭雍州淺

終南惇物至于鳥鼠

**志**右扶風武功

大壹山古文以爲終南垂山古文以

爲敦物皆在縣東

**注**地理志終南惇物皆在右扶風武功也

史記集解

原隰底績至于豬野

**志**武威郡

故匈奴休屠王地

武威

休屠澤在東北古

文以爲豬壘澤

**注**詩云度其隰原卽此原隰

正義

地理志都野在武威

名曰休屠澤

史記集解

循按正義引云鄭氏以爲詩云度其隰原卽此原隰是也原隰，鹵地從此致功西至豬野之澤也是也以下正義之文孔傳云皆言致功故正義有從

此致功云云也傳同叔禹貢集解概以爲鄭注蔡傳引鄭氏云其地在圖又約其辭耳

三危既宅三苗丕叙

**注**地記書云三危之山在鳥鼠之西南當岷山則在

積石之西南

正義

循按史記索隱云鄭氏引河圖及地說云三危山

在鳥鼠西南與岐山相連與正義引小異在積石

西南必不連岐山岐蓋嶠山之譌禮記正義引張

逸問禮注曰書說書說何書也答曰尙書緯也當

爲注時在文網中嫌引秘書故諸所牽圖識者皆

謂之說此引地記而索隱以爲河圖地說則亦緯  
識也

厥土惟黃壤厥田惟上上厥賦中下厥貢惟球琳琅玕

**注**球美玉也琳美石也琅玕珠也

詩韓奕  
正義

浮于積石至于龍門西河會于渭汭

**志**金城郡河關

積石山在西南羌中河水行塞外東

北入塞內至章武人海過郡十六行九十四百里

左

馮翊夏陽

禹貢梁山在西北龍門山在北

織皮崑崙析支渠搜西戎卽叙

**注**衣皮之民居此崑崙析支渠搜三山之野者皆西

戎也

正義

循按引鄭注下正義云鄭以崑崙爲山謂別有崑崙之山非河所出者也此正義約鄭之辭非鄭注也王本孫本皆以此爲鄭注

禹貢鄭注釋卷上終

姪廷琮校字